

Bases de cotización no Réxime Xeral da Seguridade Social por concello de residencia da persoa afiliada

Datos correspondentes marzo de 2025

Data de publicación 29/08/2025

Principais resultados

- En marzo de 2025 había 803.010 persoas afiliadas á Seguridade Social con residencia en Galicia e que cotizaban no Réxime Xeral, un 2,1 % máis que en marzo de 2024.
- A base media mensual de cotización situouse nos 2.122,7 euros por persoa en marzo de 2025, un 4,4 % máis que en marzo de 2024.
- En marzo de 2025, a base media mensual de cotización por persoa dos homes foi de 2.279,7 euros, 309,3 euros superior á das mulleres.
- Os concellos cunha base media mensual de cotización máis elevada en marzo de 2025 foron: Oleiros, Santiago de Compostela, A Coruña e Cervo.

1. Evolución das persoas cotizantes e da súa base media de cotización en Galicia

En marzo de 2025, rexistráronse en Galicia unhas 803.010 persoas afiliadas á Seguridade Social con residencia na Comunidade Autónoma e que cotizaban ao Réxime Xeral. A base media de cotización deste grupo situouse nos 2.122,7 euros ao mes por persoa.

A cifra de cotizantes no Réxime Xeral en Galicia de 2025 é similar á de hai 3 meses, en decembro . A base media mensual por persoa creceu un 2 % neste mesmo período. Con respecto a marzo do ano anterior, a cifra de cotizantes creceu un 2,1 % e o valor da base media mensual de cotización, un 4,4 %.

Cotizantes e base media mensual por persoa no Réxime Xeral da Seguridade Social das persoas con residencia en Galicia. Marzo de 2025

Unidade: cotizantes, euros/persoa, taxas de variación

Variable	2025/Marzo	Variación relativa respecto a 2024/Decembro	Variación relativa respecto a 2024/Marzo
Cotizantes	803.010	0	2,1
Base media mensual	2.122,7	2	4,4

Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))


A evolución interanual, tanto das persoas cotizantes como da base media mensual por persoa no Réxime Xeral en Galicia, foi positiva dende xaneiro do 2022.

Na cifra de cotizantes obsérvase unha certa tendencia á estacionalidade (gráfico de abaixo, eixe vertical esquerdo); así, a cifra de persoas cotizantes é maior nos meses de verán que no resto dos meses.

En canto á base media mensual, esta mantívose relativamente estable dende o primeiro mes da serie (gráfico de abaixo, eixe vertical dereito) ata setembro do 2022, mes no que experimenta unha leve caída. A partir dese momento inicia unha tendencia ascendente.

Evolución das persoas cotizantes e da súa base media mensual no Réxime Xeral da Seguridade Social das persoas con residencia en Galicia

Unidade: cotizantes, euros/persoa



Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

2. Base media segundo as características da persoa cotizante

O 49,3 % das persoas que cotizaron ao Réxime Xeral da Seguridade Social en Galicia no mes de marzo de 2025, con residencia tamén na Comunidade Autónoma, eran homes e o 50,7 % restante, mulleres. Polo tanto, o xénero feminino supera lixeiramente ao masculino en número de cotizantes.

Pola contra, a base media de cotización por persoa dos homes é significativamente superior á das mulleres: a primeira situouse en marzo en 2.279,7 euros, mentres que a base media para as mulleres se situou nos 1.970,4 euros por muller, 309,3 euros por debaixo da dos homes.

Cotizantes e base media mensual por persoa no Réxime Xeral da Seguridade Social das persoas con residencia en Galicia, segundo o xénero. Marzo de 2025

Unidade: cotizantes, euros/persoa

Variable	Total	Homes	Mulleres
Cotizantes	803.010	395.571	407.439
Base media mensual por persoa	2.122,7	2.279,7	1.970,4

Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))


A contía da base media mensual por persoa aumenta coa idade do cotizante.

Os tres primeiros grupos que figuran no gráfico seguinte, por debaixo de 30 anos, de 30 a 34 anos e dos 35 aos 39 anos, contan cunha base media por debaixo da media galega. No caso do primeiro grupo, o de menor base de cotización, esta atópase un 28 % por debaixo da media de Galicia (1.528,1 para o grupo de idade dos menores de 30 anos, fronte a 2.122,7 euros por persoa de media en Galicia en marzo de 2025).

A partir do grupo de idade de 40 a 44 anos, a base media de cotización por persoa supera xa os 2.000 euros mensuais; esta sobe de grupo en grupo, ata o de maior idade, o das persoas que contaban con 60 ou máis anos en marzo, que percibiron de media unha base de cotización de 2.331,8 euros mensuais.

Base media mensual por persoa no Réxime Xeral da Seguridade Social das persoas con residencia en Galicia, segundo o grupo de idade. Marzo de 2025

Unidade: euros/persoa



Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

3. Base media segundo as características da afiliación

En marzo, o 75,8 % das persoas que cotizaron ao Réxime Xeral da Seguridade Social en Galicia e que residían tamén na Comunidade Autónoma, estaban vinculadas á empresa mediante un contrato de tipo indefinido; o 15,3 %, mediante un contrato de tipo temporal e o 8,9 % son afiliados/as que non teñen contrato, ben por seren funcionarios/as, persoal estatutario ou persoas contratadas mediante programas de formación ou prácticas non laborais. O grupo das persoas afiliadas que non teñen contrato, é o que conta coa base de cotización media máis elevada, que se sitúa nos 3.183,2 euros ao mes por persoa. A base media mensual por persoa para os cotizantes con contrato indefinido no mes de marzo de 2025 situouse nos 2.048,7 euros, e a do grupo de cotizantes con contrato temporal situouse 176,7 euros por debaixo, en 1.872 euros por persoa.

No relativo ao tipo de xornada, o 83,3 % dos cotizantes ao Réxime Xeral en Galicia traballa a xornada completa e o 16,7 % traballa a xornada parcial. A base media de cotización das persoas que traballaron a xornada completa no mes de marzo en Galicia, cuxa residencia se situaba tamén na Comunidade Autónoma galega, foi de 2.318 euros por cotizante. A base media de cotización do grupo de cotizantes a xornada parcial situouse neste mes nos 1.150,3 euros por persoa.

Cotizantes e base media mensual por persoa no Réxime Xeral da Seguridade Social das persoas con residencia en Galicia, segundo o tipo de contrato e o tipo de xornada. Marzo de 2025

Unidade: cotizantes, euros/persoa

Variable	Cotizantes	Base media mensual por persoa
Total	803.010	2.122,7
- Completa	668.742	2.318,0
- Parcial	134.268	1.150,3
Indefinido	608.537	2.048,7
- Completa	504.477	2.234,3
- Parcial	104.060	1.149,1
Temporal	122.924	1.872,0
- Completa	94.329	2.111,2
- Parcial	28.595	1.082,9
Sen contrato	71.549	3.183,2
- Completa	69.936	3.200,9
- Parcial	1.613	2.419,8

Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))


Nota: a categoría “Sen contrato” inclúe ás persoas para as que non figura o tipo de contrato no ficheiro (por erro ou omisión), funcionarios e funcionarias, persoal estatutario, programas de formación e prácticas non laborais en empresas (consultar os Reais Decretos 1493/2011 e 1543/2011).

Como se observa na seguinte gráfica, existen importantes diferenzas nas bases medias de cotización segundo a actividade económica que realice a persoa cotizante. O valor máis elevado acádase nas seccións K e L da CNAE-2009, que corresponden coas actividades relacionadas co sector das finanzas e dos seguros, onde a base media mensual por persoa supera nun 53,6 % á media galega en marzo de 2025 (acadando os 3.259,7 euros/persoa). As seguintes actividades económicas con maior base de cotización mensual por persoa son as correspondentes a actividades relacionadas coa produción de enerxía, subministración de auga e xestión de residuos (seccións D e E da CNAE-2009, con 2.688 euros/persoa), administración pública e defensa (sección O, con 2.586,8 euros) e as actividades relacionadas coa información e as comunicacións (sección J, 2.529 euros por persoa).

Pola contra, na sección I da CNAE-2009, que engloba ás actividades relacionadas coa hostalaría, a base media de cotización mensual por persoa sitúase un 44,3 % por debaixo da media de Galicia; neste grupo de actividades, a cotización no Réxime Xeral da Seguridade Social en marzo de 2025 situouse nos 1.182,4 euros por persoa. Nas actividades correspondentes ás seccións N (actividades administrativas e servizos auxiliares), R-S (actividades artísticas, recreativas e de entretemento; outros servizos) e T-U (actividades dos fogares como produtores de bens e servizos para uso propio) da CNAE-2009, a base media de cotización por persoa no Réxime Xeral da Seguridade Social tamén se atopa bastante por debaixo da media galega, arredor dos 1.400 euros por persoa.

Base media mensual por persoa no Réxime Xeral da Seguridade Social das persoas con residencia en Galicia, segundo a sección de actividade económica. Marzo de 2025

Unidade: euros/persoa



Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

Nota: A. Agricultura, gandería, silvicultura e pesca; B, C. Industrias extractivas; industria manufacturera; D, E. Enerxía, subministración de auga e xestión de residuos; F. Construción; G. Comercio por xunto e ao retalho; reparación de vehículos de motor e motocicletas; H. Transporte e almacenamento; I. Hostalaría; J. Información e comunicacións; K, L. Actividades financeiras e de seguros; actividades inmobiliarias; M. Actividades profesionais, científicas e técnicas; N. Actividades administrativas e servizos auxiliares; O. Administración pública e defensa; seguranza social obrigatoria; P. Educación; Q. Actividades sanitarias e de servizos sociais; R, S. Actividades artísticas, recreativas e de entretemento; outros servizos; T, U. Actividades dos fogares como produtores de bens e servizos para uso propio; actividades de organizacións e organismos extraterritoriais


4. Distribución territorial da base media de cotización

As sete grandes cidades galegas e os seus concellos limítrofes concentran as maiores bases de cotización de Galicia; en particular, na conurbación que rodea as cidades da Coruña e Ferrol, a base media mensual por persoa sitúase por riba dos 1.900 euros, como se observa no mapa de abaixo. Oleiros é, de feito, o concello coa base de cotización máis elevada de Galicia en marzo de 2025; as persoas afiliadas con residencia en Oleiros cotizan por unha base que acada os 2.579,7 euros de media.

Tamén é elevada a base media de cotización mensual por persoa en parte dos concellos costeiros que conforman as comarcas da Mariña Oriental, Central e Occidental (en Foz, Burela, Cervo, Xove e Viveiro), en Cee (concello da Costa da Morte) e na comarca de Valdeorras, entre outros.

Base media mensual por persoa no Réxime Xeral da Seguridade Social das persoas con residencia en Galicia, segundo o concello de residencia. Marzo de 2025

Unidade: euros/persoa



Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

Na seguinte táboa preséntanse os 15 concellos con maior base media mensual en marzo de 2025. Santiago de Compostela é, despois de Oleiros, o concello con maior base media de cotización mensual, acadando os 2.379,9 euros de media por persoa no mes de marzo de 2025. A continuación sitúanse Coruña, A, con 2.335,5 euros/persoa, e Cervo, con 2.310,3 euros por persoa.

Táboa cos 15 concellos de Galicia con maior base media mensual por persoa no Réxime Xeral da Seguridade Social. Marzo de 2025

Unidade: cotizantes, euros/persoa

Espazo	Cotizantes	Base media mensual por persoa	Índice da base media (Galicia=100)
15058 Oleiros	12.145	2.579,7	121,5
15078 Santiago de Compostela	34.191	2.379,9	112,1
15030 Coruña, A	80.432	2.335,5	110,0
27013 Cervo	1.190	2.310,3	108,8
15008 Bergondo	2.120	2.300,0	108,4
15004 Ares	1.784	2.276,6	107,2
15002 Ames	12.636	2.261,4	106,5
15082 Teo	6.647	2.259,2	106,4
15013 Brión	2.706	2.254,9	106,2
15087 Valdoviño	1.786	2.249,5	106,0
15048 Miño	2.212	2.237,0	105,4
15024 Cerceda	1.564	2.233,8	105,2
15091 Vilarmaior	360	2.233,5	105,2
36057 Vigo	95.308	2.233,5	105,2
36038 Pontevedra	25.120	2.233,1	105,2

Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

As bases medias no Réxime Xeral máis baixas sitúanse, pola súa banda, nos concellos do sur de Ourense; nos concellos que se sitúan no límite entre as provincias de Pontevedra e Ourense, e no interior de Lugo (exceptuando a propia capital e os concellos que a bordean). En Quintela de Leirado, por exemplo, a base de cotización media por persoa non supera os 1.600 euros en marzo de 2025 (1.531,8); en Ramirás situouse nos 1.649,9 euros/persoa e Calvos de Randín, nos 1.652,2 euros/persoa. Na táboa de abaixo complétase o listado dos 15 concellos con menor base de cotización no mes de marzo.

Táboa cos 15 concellos de Galicia con menor base media mensual por persoa no Réxime Xeral da Seguridade Social. Marzo de 2025

Unidade: cotizantes, euros/persoa

Espazo	Cotizantes	Base media mensual por persoa	Índice da base media (Galicia=100)
32066 Quintela de Leirado	92	1.531,8	72,2
32068 Ramirás	284	1.649,9	77,7
32016 Calvos de Randín	110	1.652,2	77,8
32091 Vilardevós	261	1.666,2	78,5
32053 Oímbra	304	1.686,6	79,5
32028 Cualedro	313	1.707,2	80,4
32084 Vereia	212	1.709,1	80,5
27055 Samos	237	1.718,2	80,9
32021 Castrelo do Val	166	1.718,2	80,9
32064 Pontedeva	94	1.720,3	81,0
36027 Meaño	1.406	1.724,6	81,2
36025 Lama, A	456	1.724,9	81,3
32005 Baltar	187	1.733,0	81,6
32010 Beade	67	1.734,8	81,7
32078 Sarreaus	208	1.738,4	81,9

Fonte: IGE. Bases de cotización no Réxime Xeral da Seguridade Social por concello de residencia da persoa afiliada ([descarga da táboa](#))

5. Notas metodolóxicas

O principal obxectivo desta [actividade estatística](#) é proporcionar información sobre as bases de cotización no Réxime Xeral da Seguridade Social das persoas que traballan e residen en Galicia.

Por medio desta estatística caracterízanse ás persoas que cotizan neste réxime, que supón arredor do 75 % do Sistema da Seguridade Social, segundo as súas variables persoais (xénero, grupo de idade, nacionalidade e concello de residencia) e laborais (tipo de contrato, tipo de xornada, actividade económica e grupo de cotización) e calcúlase, para cada categoría, a base media mensual de cotización por persoa.

En moitas ocasións, a base de cotización coincide coa retribución mensual bruta da persoa e é o importe que se emprega no cálculo das cantidades que deben ingresar a empresa e o traballador ou a traballadora para ter dereito, no futuro, á percepción dunha prestación do Sistema da Seguridade Social (por exemplo, no momento da xubilación). Polo tanto, coñecer o seu valor, así como a súa evolución e distribución polo territorio, é vital para o estudo do mercado laboral de Galicia.

A poboación obxecto de estudo é o conxunto das persoas que cotizaron ao Réxime Xeral da Seguridade Social polo menos un día no mes de referencia, cuxa conta de cotización na súa afiliación principal se atope inscrita nunha das catro provincias de Galicia e que, ademais, residan na Comunidade Autónoma.

A principal fonte de información da que se nutre esta estatística é o ficheiro de bases de cotización no Réxime Xeral que facilita a Tesourería Xeral da Seguridade Social (TGSS) ao Instituto Galego de Estatística (IGE) con carácter trimestral.

A metodoloxía empregada polo IGE na súa elaboración baséase na establecida pola TGSS na súa publicación, cunha excepción: no seu caso, a clasificación territorial da poboación en estudo vén dada polo lugar de traballo, mentres que na estatística do IGE corresponde co lugar de residencia. De aí que existan pequenas diferenzas nas cifras de cotizantes e base media publicadas polo Ministerio para Galicia e as que derivan desta estatística do IGE. A metodoloxía completa pode consultarse na seguinte [ligazón](#).

Definicións, fontes e máis información

Metodoloxía

- Metodoloxía

Definicións

- Definicións

Descarga de datos

- Cotizantes, base de cotización media mensual por persoa e índice da base media en relación á media de Galicia (Galicia=100) no Réxime Xeral das persoas que estiveron afiliadas en alta laboral á Seguridade Social nalgún momento do mes de referencia, segundo o concello de residencia e o xénero. Galicia, provincias, comarcas e concellos
- Cotizantes, base de cotización media mensual por persoa e índice da base media en relación á media de Galicia (Galicia=100) no Réxime Xeral das persoas que estiveron afiliadas en alta laboral á Seguridade Social nalgún momento do mes de referencia, segundo o concello de residencia e o grupo de idade. Galicia, provincias, comarcas e concellos
- Cotizantes e base de cotización media mensual por persoa no Réxime Xeral das persoas que estiveron afiliadas en alta laboral á Seguridade Social nalgún momento do mes de referencia, segundo a comarca de residencia, o tipo de contrato e o tipo de xornada. Galicia, provincias e comarcas
- Cotizantes e base de cotización media mensual por persoa no Réxime Xeral das persoas que estiveron afiliadas en alta laboral á Seguridade Social nalgún momento do mes de referencia, segundo a comarca de residencia e a sección de actividade económica (1 dígito da CNAE-2009). Galicia, provincias e comarcas

Fontes de información

IGE. Bases de cotización no Réxime Xeral da Seguridade Social por concello de residencia da persoa afiliada